

www.BibleForChildren.org

उत्पती 3



आदामनी त्यानी बाईना नाव हव्वा ठेवं, कारण
ती सगया जीवधारी जणसनी माय शे.



परमेश्वर देवनी बनाडेल सर्वा वनचरमा साप
पक्का लबाड व्हता. तो आदामनी बाईले बोलना,
"तुम्हीन बागमाधला कोणतं बी झाडनं फळ
खावानं नही अश देवनी तुमले सांगं हाई खरं शे
का?"



बाईनी सापले सांगं,
"बागमाधला झाडंसनं फळ
खावानी आमले परवांगी शे,
पण बागना मध्यभागमा जे
झाड शे त्यानाविषयी देवनी आमले
सांगेल शे की, त्यानं फळ खावानं नही;
त्याले स्पर्श बी करानं नही,
करशात तर मरशात."



साप त्या बाईले बोलना,
"तुम्हीन खरोखर मरावुत
नहीत." कारण देवले हाई
माहिती शे की, ज्या दिनले
तुम्हीन त्यानं फळ खाशात त्याच
दिनले तुमना डोया उघडतीन,
अनी तुम्हीन देवना मायक चांगलं
अनी वाईट जाणनारा व्हशात.



त्या झाडनं फळ खावाले चांगलं, दखाले मनोहर,
अनी समजदार कराले इष्ट शे अश
त्या बाईले दिसनं, तवय तिनी त्या झाडनं फळ
तोडीसन खादं अनं आपलासोबत आपला नवराले
बी ते दिधं; अनं त्यानी पण ते फळ खादं.



तवय त्या दोनी नवरा बायकोसना डोया
उघडनात अनी आपन नंगा शेतस अश त्यासले
समजनं; तवय त्यासनी आपलं अंग झाकाकरता
अंजिरना झाडना पानं शिईसन स्वतःले झाकी
लिधं.





तवय परमेश्वर
देवनी आदामले हाक
मारीसन सांगं, "तु कोठे शे?" आदामनी
देवले सांगं, "मी बागमा तुना आवाज ऐका,
पण मी नंगा शे, म्हणीसन भ्याईसन लपनु."





देवनी त्याले सांगं,
"तु नंगा शे हार्ई तुले कोणी सांगं?
ज्या झाडनं फळ तु खावानं नही अशी
आज्ञा मी तुले देल व्हती त्यानं फळ तु खादं का?"



आदाम बोलना, "जी बाई तु माले सोबतमा दिधी तिनी त्या झाडनं फळ माले दिधं अनी ते मी खादं." परमेश्वर देव त्या बाईले बोलना, "हाई तु काय करं? बाई बोलनी, सापनी माले भुरळ घाली म्हणीसन मी ते खादं."





पण ज्या भुमीमाईन त्यासले बनाडेल व्हतं तिनी
मशागत कराले पाहिजे म्हणीसन परमेश्वर देवनी
त्यासले एदेन बागमाईन बाहेर
काढी दिधं.






देवनी मानवले बाहेर काढी दिधं अनी जिवनना
झाडकडे जाणारा वाटनी राखण कराकरता एदेन
बागना पुर्व भागले करूबीम
अनं गरागर फिरणारी ज्वालारूपी
तलवार ठेई.




आदाम त्यानी बाई हव्वा हिना पान गया; ती गर्भवती व्हईसन तिनी काईनले जन्म दिधा; ती बोलनी, "परमेश्वराना साहाय्यातीन माले पुरुषसंतान लाभना शे." नंतर तिनी त्याना भाऊ हाबेल याले जन्म दिधा. हाबेल मेंढपाळ व्हयना अनी काईन शेतकरी व्हयना.



काही काळ लोटावर अश व्हयना की, काईननी परमेश्वरले शेतना
उत्पनापाईन काही अर्पन आणात. हाबेलनी बी आपला मेंढरंसना
कळपसमाईन पहिला जन्मेलसपाईन, म्हणजे
त्यामातीन चांगलं चरबीवालं अर्पन आणं,
परमेश्वरनी हाबेल अनं त्याना अर्पन यासना आदर
करा; पण काईन अनं त्यानं अर्पन यासना त्यानी
आदर करा नही; म्हणीसन काईन संतापना
अनं त्यानं तोंड
उतरना.



मंग कार्ईननं त्याना भाऊ हाबेल यानासंगे बोलनं व्हयनं; अनी अश व्हयनं की, त्या वावरमा व्हतात तवय कार्ईननी आपला भाऊ हाबेल यानावर चाल करीसन त्याले मारी टाका.



मंग परमेश्वर देवनी काईनले ईचारं, "तुना भाऊ हाबेल कोठे शे?"
तो बोलना, "माले माहित नही; मी काय मना भाऊना राखणदार शे?"
काईन परमेश्वरपाईन निंघना अनी एदेनना पुर्वले नोद नावना देशमा
वस्ती करीन राहिना.



आदाम आपली बायकोपन गया, अनी तिले पोऱ्या व्हयना,
त्याना नाव तिनी शेथ ठेवं; ती बोलनी, "काईननी हाबेलना
घात करा म्हणीन देवनी त्याना जागी
माले दुसरा पोऱ्या देल शे."



शेथ व्हावर आदाम आठशे वरीस जगना, अनं त्याले अजुन पोऱ्या अनं पोऱ्यी व्हयनात. आदाम जोडे जोडे नऊशेतीस वरीस जगना, मंग तो मरण पावना.



पृथ्वीवर मानवनी दुष्टाई खुप शे, त्यासन्या मनमाधल्या
येनाऱ्या सगळ्या कल्पना मात्र एकसारख्या वाईट
शेतस अश परमेश्वर देवनी दखं.



तवय परमेश्वर बोलना, "मी बनाडेल मानवले पृथ्वीवरीन नष्ट करसु; मानव, पशु, रांगनारा प्राणी, आकाशमाधला पक्षी ह्या सगया नष्ट करसु, कारण त्यासले बनाडाना माले अनुताप व्हई राहिना शे."



पण नोहावर परमेश्वर देवनी कृपादृष्टी व्हाती.
नोहाले शेम, हाम, अनं याफेथ अश तीन पोऱ्या व्हयनात.



देवनी जगवर ईतली प्रिती करी की त्यानी
आपला एकुलता एक पोऱ्या दिधा, याकरता की
जो कोणी त्यानावर ईश्व्वास ठेवस त्याना नाश
व्हणार नही तर त्याले
सार्वकालिक जिवन भेटी.



रोम 3:23 कारण सर्वासिनी पाप करेल शे अनी त्या देवना गौरवपाईन दुर
व्हयेल शेतस.

रोम 6:23 कारण पापना पगार मरण शे, पन आपला प्रभु येशु ख्रिस्त
यानाद्वारा सर्वकाळना जिवन हाई देवना कृपादान शे.

इब्री 9:27 जस मनुष्यले एकदावनं मरणं अनी त्यानानंतर देवकडतीन न्याय
व्हणं नेमी ठेयल शे.

इफिस 2:8,9 कारण कृपातीनचं ईश्र्वासनाद्वारा तुमनं तारण व्हयेल शे अनी
हाई तुमना हातघाई व्हयेल शे अस नही, तर हाई देवनं दान शे; कोणी
बडाई कराले नको म्हणीसन कर्म करीसन हाई व्हयनं नही.

रोम 10:9,10 कारण, येशु प्रभु शे, अस जर तू आपला तोंडतीन कबुल
करशी अनी, देवनी त्याले मरेलस मातीन ऊठाडं असा आपला अंतःकरणमा
ईश्र्वास ठेवशी तर तुनं तारण व्हई. कारण जो अंतःकरणतीन ईश्र्वास ठेवस
तो न्यायी ठरस अनं जो तोंडतीन कबुल करस त्यानं तारण व्हस.



योहान 3:16,17 देवनी जगवर ईतली प्रिती करी की त्यानी आपला एकुलता एक पोऱ्या दिधा, याकरता की जो कोणी त्यानावर ईश्र्वास ठेवस त्याना नाश व्हणार नही तर त्याले सार्वकालिक जिवन भेटी. देवनी पोऱ्याले जगना न्यायनिवाडा कराले नही, तर त्यानाद्वारे जगनं तारण व्हावं म्हणीन धाडेल शे.

1 योहान 5:11-13 ती साक्ष हाईच शे की, देवनी आपले सार्वकालिक जिवन देयल शे अनी हाई जिवन त्याना पोऱ्यामा शे. ज्याले देवना पोऱ्या लाभेल शे त्याले जिवन लाभेल शे; ज्याले देवना पोऱ्या लाभना नही त्याले जिवन लाभना नही. देवना पोऱ्याना नाववर ईश्र्वास ठेवनारा तुमले अनंत जिवन लाभेल शे हाई तुमले समजाले पाहिजे म्हणीसन मी हाई तुमले लिखी ऱ्हायनु शे.



उत्पत्ती 3 – 6

Storyline by: Edward D. Hughes

Illustrated by: Byron Unger, Lazarus
and Alastair Paterson

Adapted by: M. Maillot; Tammy S.

Ahirani Bible (ahr) © The Word for the World International
and Ahirani Christi Iswari Mandli, Sakri, Dhule, Maharashtra
2025

<https://www.bible.com/en-GB/bible/2776/GEN.1.A1125>

©2026 Bible for Children, Inc.

www.M1914.org

www.bibleforchildren.org

